

ՀԱՂՈՐԴՈՒՄՆԵՐ СООБЩЕНИЯ

ԱԼԵՔՍԱՆԴՐ ԵՐԻՑՅԱՆԻ
ՍՈՅԻԱԼ-ՏՆՏԵՍԱԳԻՏԱԿԱՆ ՀԱՅԱՅՔՆԵՐԸ

Ռ. Ն. ՍԱՐԻՆՅԱՆ

XIX դարի երկրորդ կեսի հայ գրական-հասարակական մաքի պատմության նշանավոր անուններից է Ալեքսանդր Երիցյանը: Նրա գրչին են պատկանում պատմագիտական, հնագիտական, հրապարակախոսական, ազգագրական և տնտեսագիտական բնույթի բազմաթիվ հոդվածներ և ուսումնասիրություններ, որոնք առաջագրում են հայ ժողովրդի պատմության և ժամանակի սոցիալ-տնտեսական ու գաղափարական տեղաշարժերի ուրույն ընկալումներ ու մեկնաբանումներ: Երիցյանին առանձնապես զբաղեցրել են Անդրկովկասի սոցիալ-տնտեսական զարգացման հեռանկարի հարցերը: Վերլուծելով երկրամասի տնտեսական հարաբերությունները, երևույթները քննելով ուսումնասիրության տնտեսագիտական ուսմունքների փորձով, նա տեսակետներ է արտահայտել տնտեսագիտական կատեգորիաների և տեսական այլ պրոբլեմների վերաբերյալ, որոնք ուշագրություն արժանի տեղ են գրավում հայ տնտեսագիտական մտքի պատմության մեջ:

Իր հայացքներով ու ըմբռնումներով, ինչպես իրավացիորեն նկատում է Ա. Ս. Համբարյանը, Երիցյանն առավելապես հարում էր ազգային-պահպանողական հոսանքին և հենց այստեղ էլ պետք է որոնել աշխարհայացքային այն հիմքը, որի դիտակետից նա մեկնաբանել է հայ ժողովրդի սոցիալական ու տնտեսական զարգացման հարցերը¹: 1866 թ. Գ. Տեր-Ալեքսանդրյանցը Թբիլիսիում սկսում է հրատարակել «Վաճառական» շաբաթաթերթը, հիմնական աշխատակից ունենալով Ալեքսանդր Երիցյանին: Թերթի անվանումն ինքնին որոշ չափով բնորոշում է նրա հիմնադիրների սոցիալ-տնտեսական հայացքության բովանդակությունը: Եվ որովհետև երկրամասի տնտեսական կյանքում տիրապետողը առևտրական կապիտալն էր, ուստի և տնտեսագիտական արժարժույթներում առաջնակարգ նշանակություն են ստանում փողի և շրջանառության ոլորտի հարցերը:

Հայտնի է, որ 1861—65 թթ. քաղաքացիական պատերազմը Ամերիկայում որոշակի տնտեսական հետևանքներ ունեցավ կապիտալիստական աշխարհի և հատկապես եվրոպական երկրների էկոնոմիկայի վրա: Ծայրահեղորեն կրուճատվեց բամբակի հումքի ներմուծումը², առաջ բերելով, այսպես ասած, «բամբակի սով» եվրոպական շուկայում, խուլացնելով արդեն բնկված համաշխարհային ճգնաժամը: Ինչպես նկատում է Ա. Երիցյանը, դրա հետևանքով «Ֆաբրիկայումը հարյուր հազարավոր բանվոր մշակները մնացին անդործ, ֆաբրիկաների մեծ մասը կողպվեցավ: Բամբակ չկա—առևտրական աշխարհումը կնշանակի գործ չկա, հաց չկա»³: Եվ ահա եվրոպական երկրները սկսեցին որոնել նոր շուկաներ, ապրանքաշրջանառության ոլորտն ընդգոկելով ասիական երկրները, այդ թվում նաև Անդրկովկասը: Երիցյանը նշում է, որ եվրոպական երկրների տնտեսական այդ կացությունը բացասաբար անդրա-

¹ Տե՛ս «Պատմա-բանասիրական հանդես», 1960, № 1, էջ 180:

² Տե՛ս Л. Мендельсон. Экономические кризисы и циклы XIX века. М., 1949, 70.

³ «Վաճառական». 1866, № 1, էջ 1:

դարձավ. կանոնավոր դրամաշրջանառության վրա և հատկապես շրջանառության մեջ եղած փողի քանակության վրա: Կ. Մարքսը գրում է. «Բուն գործարանային օկրուգներում արդեն կանխված լինելով բամբակի սովի կողմից, որը ներդրման սովորական ոլորտներից շատ կապիտալներ քշեց դեպի փողային շուկայի խոշոր կենտրոնները, ճգնաժամն այս անգամ առավելապես ֆինանսական բնույթ ընդունեց: Նրա սկսվելու ազդանշանը եղավ 1866 թ. Լոնդոնի հսկայական բանկերից մեկի անանկացումը, որին արագ հաջորդեց բազմաթիվ ֆինանսական սպեկուլյանտական ընկերությունների կործանումը»⁴:

Պակասել էր շրջանառության մեջ եղած կանխիկ փողը, բարձրացել էին վարկի տոկոսները, որին, Երիցյանի կարծիքով, էլ ավելի նպաստեց ապրանքաշրջանառության վերելքը ասիական երկրներում: Բանն այն է, որ եվրոպական տերությունները ամերիկյան բամբակի դիմաց տրված ոսկին ու արծաթը նորից հտ էին առանում գնված բամբակից պատրաստված ապրանքները ամերիկյան շուկայում իրացնելու միջոցով, մինչդեռ «ազնիվ մետաղները» կուտակվում էին ասիական երկրներում, տեղական շուկայի ցածր տարողության ու եվրոպական ապրանքների նկատմամբ համապատասխան պահանջարկի բացակայության հետևանքով: Ի դեպ, այդ իրողությունը նկատում էր նաև Տոլստոյ-Բարանովսկին: Նրա կարծիքով, արևելյան երկրներից փողի կանխիկ վճարումով ապրանքների ներմուծումը միացյալ թագավորություն, «Անգլիայում առաջ բերեց դրամական ճգնաժամ»⁵: Ա. Երիցյանը գտնում է, որ ասիական ժողովուրդների ընդհանուր քաղաքակրթական մակարդակի հետագա բարձրացման պարագայում, ազնիվ մետաղները նորից կհոսեն Եվրոպա և դա կհանգեցնի այն բանին, որ «Եվրոպայումը հաջր կթանկանա, ապրուստը և մշակը կթանկանա, փողը մեծ շահ կունենա, հարուստները առանձին շահով կգործադրեն փողը և ավելի շուտ կհարստանան, աղքատները հտին չքավորությունն են կհասնեն: Մշակութենի գինը, որ հացի գնի հետ մեկ կերպով բարձրանում է միշտ, կթանկանա, մշակ մարդիքը ուրեմն կամաց-կամաց փողատեր կդառնան: Հարուստները և մշակները կհարստանան, գործին՝ անընդունակ մարդիքը՝ այսինքն նշանակած ոռճիկով ապրողները կաղքատանան և կղրվարանա նրանց կյանքը»⁶:

Ակներև է, որ տնտեսագետը դրամաշրջանառության կարգավորմամբ է պայմանավորում տնտեսական օրինաչափ զարգացումը, հասարակության սոցիալական դիֆերենցիացիայի փաստը, ինչպես նաև մշակների կենսապայմանների բարեկեցությունը: Պետք է նշել, սակայն, որ թեև Երիցյանը նկատում էր տնտեսական ճգնաժամի ինչ-ինչ անխուսափելի հետևանքներ, այնուամենայնիվ չէր ըմբռնում, որ առևտրի և դրամաշրջանառության ճգնաժամը հենց արդյունաբերական ճգնաժամի արդյունքն է, այսինքն նյութական արտադրության ոլորտի ճգնաժամի արդյունքն ու զրսևորման ձևերից մեկը: Տնտեսական ճգնաժամների բացատրության հարցում նա ըստ էության տուրք է տալիս վարկադրամային տեսությանը: Իսկ որքանով «փոխանակային կոնցեպցիայի» այս ելակետը շրջանառության ոլորտին հատկացնում էր առաջնային նշանակություն, դրանով իսկ այն ձեռք է բերում իդեալիստական բովանդակություն: Քննադատելով «փոխանակային կոնցեպցիայի» տեսաբաններին, Կ. Մարքսը գրում է. «Տասնիններորդ դարի առևտրային ճգնաժամերը, նամանավանդ 1825-ի և 1836-ի մեծ ճգնաժամերը, Ռիկարդոյի դրամական թեորիայի հետագա զարգացում առաջ չբերին, բայց առաջացրին նրա մի նոր կիրառում: Այդ ճգնաժամերն այժմ այլևս առանձին-առանձին տնտեսական երեվոլյուցիաներ չէին, — ինչպես Յոմի մոտ՝ ազնիվ մետաղների արժեքազրկումը

⁴ Կ. Մարքս. Կապիտալ. հ. 1, Երևան, 1954, էջ 700:

⁵ М. И. Туган-Барановский. Промышленные кризисы в современной Англии, их причины и влияние на народную жизнь. С.-Петербург, 1894, с. 249.

⁶ «Վաճառական». 1866, № 1, էջ 2:

16-րդ ու 17-րդ դարերում, կամ Ռիկարդոյի մոտ՝ թղթագրամի արժեքազրկումը 18-րդ դարի ընթացքում և 19-րդ դարի սկզբում, — այլ համաշխարհային շուկայի մեծ փոթորիկներն էին, որոնց մեջ դուրս էր պոռթկում բուրժուական արտադրապրոցեսի բոլոր տարրերի կոնֆլիկտը, փոթորիկներ, որոնց պատճառն ու նրանց դեմ պայքարելու միջոցը սրոնում էին այդ պրոցեսի ամենամակերեսային և ամենամեղացական ոլորտում, դրամաշրջանառության ոլորտում»⁷։

Բայց ինչ է փողը, որ Ա. Երիցյանին ներկայանում է որպես «ազգերի քաղաքական, բարոյական և տնտեսական վիճակը»⁸ պայմանավորող կարևորագույն գործոններից մեկը։ Կապիտալիստական հարաբերությունների զարգացման հետ ուժեղանում է փողի տիրապետությունը, նկատում է Երիցյանը։ Այն իշխում է ամենուրեք, դառնում երկրպագության առարկա, որոշում մարդու հասարակական կեցությունը, տեղն ու դիրքը։ «Մենք ամենքս էլ, — գրում է նա, — սիրում ենք փող, ոսկի, արծաթ։ Մեզ համար ոսկին հարստության, իշխանության, փառքի և բախտավորության իդեալն է»⁹։

Փողի, իբրև տնտեսական կատեգորիայի, Երիցյանի բնութագրումները հետևողական բնույթ չունեն։ Եթե նրա հայացքներում մի կողմից կարելի է նշմարել առանձին ակնարկումներ բուրժուական դասական տնտեսագետների այն դրույթի, թե փողը նույնպես ապրանք է, ինչպես «ճրագուն, կաշին, ալյուրը, գինին»¹⁰, ապա մյուս կողմից աննկատելի չէ նաև ոսկին ու արծաթը հարստության ունիվերսալ ձև դիտելու մերկանտիլիստների մտայնությունը։ «Փողը թեպետ ապրանք է, — գրում է նա, — բայց ազնիվ ապրանք է, այսինքն էնպիսի հատկություններ ունե, որ ամեն ապրանքի վրա կարելի է փոխել և սա է մենակ առուտուրի միջոցը։ Փողից է կախված ամեն տեսակ ապրանքների շինելու, գործածելու և առուտուրի դրույթունը։ Երբ փող ունենք ամեն բան լավ է գնում, իսկ փողի սակավումների ժամանակ ամեն բան ուշանում է, է՛տիբարը կորչում է, կուտր են ընկնում, ապրանքների գործածությունը քշանում է և վաճառականները չեն իմանում ինչպես ծախել իրենց ապրանքները»¹¹։

Ինչպես հայտնի է, անգլիացի տնտեսագետ Վիլյամ Պետին, քննարկելով շրջանառության համար անհրաժեշտ փողի քանակության հարցը, այն համարյուր է «քաղաքական օրգանիզմի ճարպը», որի պակասը «նույնքան է խանգարում նրա գործունեությունը, ինչքան և ավելցուկը»¹²։ Երիցյանը կարծես շարունակում է Պետիի պատկերավոր խոսքը. «Մեր կյանքում, — գրում է նա, — փողի ձեռքից ձեռք անցկենալը միևնույն նշանակություն ունե, ինչպես արյունը մեր մարմնի մեջ։ Անփողությունը միևնույնն է մեր տնտեսության համար, ինչ որ արնի սակավությունը մեր առողջության համար։ Արնի անկարգ վազելուց քայքայվում է մեր առողջությունը, իսկ երբ արյունն էլ չէ շարժվում մարդս մեռնում է. միևնույնը պատահում է և մեր կյանքում, երբ որ փողի կարիք ենք ունենում»¹³։

Ընդհանրապես փողի իբրև ապրանքի արժեքի հարցը Երիցյանին չի հետաքրքրել։ Թեկուզ նա ակնարկում է փողի «ներքին արժողության» մասին, սակայն բոլոր դիպվածներում խոսում է միայն փողի գնի մասին, ելակետ ունենալով առաջարկի ու պահանջարկի տեսությունը։ «Ճշմարիտ է, — գրում է Երիցյանը, — որ փողի գինը բարձրանում է և ցած է ընկնում հարցնողին մտիկ տալով, բայց էդ չի նշանակի թե փողը և ուրիշ ապրանքները միևնույն են։ Տեղին և ժողովրդին մտիկ տալով փողի արժեքը միշտ կարող է փոխվել. միևնույն

7 Կ. Մարքս. Քաղաքատնտեսության քննադատության շուրջը. Նրևան, 1948, էջ 221—222։

8 «Վաճառական». 1866, № 22, էջ 86։

9 Նույն տեղում, № 7, էջ 25։

10 Նույն տեղում։

11 Նույն տեղում։

12 В. Петти. Экономические и статистические работы. М., 1940, с. 25.

13 «Վաճառական». 1866, № 7, էջ 25։

փողով կարելի է երբեմն ավելի, երբեմն պակաս ապրանք առնել. բայց փողի նշանակությունը և հատկությունները ամեն տեղ միևնույն են... էդպես ուրեմն փողը առուտուրի միջոց լինելով, ապրանք չէ, ինչպես որ կարծում են տնտես-ները: Առանց թուլթուլի, շաքարի, առուտուր կարող է լինել, բայց քանի որ ամեն ապրանքների գին դնողը փողն է, առանց փողի առուտուրը անկարելի է»¹⁴: Մի այլ առիթով նա նկատում է, թե «առևտրական օրենք է, որ ամեն ապրանքի գինը կախված է թե՛ մուշտարու և թե՛ ապրանքի շատությունից»¹⁵: Վկայակոչելով Ադամ Սմիթի այն տեսակետը, թե փոխանակության փողային ձևին նախորդել է այդ ֆունկցիան կատարող այլ ապրանքների միջոցով առևտուր անելու պրակտիկան, Երիցյանը, սակայն, այլ մեկնաբանությամբ է ընկալում և ըստ էության ժխտում է փողը ապրանք դիտելու դասական տնտեսագիտության կարևորագույն դրույթներից մեկը: Ինքնին արդեն հասկանալի է, որ նա չէր կարող ըմբռնել նաև ապրանքափոխանակության զարգացման երկարատև այն պրոցեսը, որը հանգեցրեց փողի, իբրև ընդհանրական համարժեքի, առաջացմանը, մի պրոբլեմ, որ չկարողացավ լուծել ամբողջ նախամարքսյան տնտեսագիտական միտքը: Ապրանքափոխանակության վերաբերյալ Երիցյանի պատկերացումը իր հիմքով սուբյեկտիվ է, որը և ելակետ է դառնում ինչպես փողի, այնպես էլ մյուս ապրանքների արժեքի որոշման համար: Քննադատելով Յումին, Մարքսը գրում է, որ «նա շրջանառության պրոցեսի մեջ մտնում է ապրանքները առանց դնի, իսկ ոսկին ու արծաթը՝ առանց արժեքի» և դա է պատճառը, որ նա «երբեք չի խոսում ապրանքների արժեքի և ոսկու արժեքի մասին, այլ միայն դրանց փոխադարձ քանակների մասին»¹⁶:

Փողի ապրանքային բնույթի ընկալումը Երիցյանի հարցադրմաներում ուղղակիորեն առնչվում է ծագման վերաբերյալ ոչ գիտական մեկնաբանությանը: Ելակետ ունենալով փողի պետական ծագման տեսությունը, նա ենթադրում է, թե «էդպես ահա ոսկին ու արծաթը փող են համարվում ոչ թե էն պատճառով, որ երկար դիմացող, աղնիվ կամ թանկագին մետաղներ են, այլ միայն էն դուր, որ տերությունները հանձնեցրուն են առել երաշխավորությունը և էդուրով տվել են ոսկուն էն մեծ նշանակությունը, որ ունե նա առուտուրի մեջ»¹⁷: Այսպիսով, ժխտելով փողի ապրանքային բնույթը որպես տարեբայնորեն զարգացող ապրանքային հարաբերությունների օբյեկտիվ արդյունք, Երիցյանը հանգում է փողի նոմինալիստական տեսությանը, դիտելով այն որպես իրավակարգի արդյունք, որով և որոշվում է նրա վճարունակությունը: «Ամենքը գիտեն,— գրում է նա,— որ ոսկին ու արծաթը կտրում են փողերանց (մանետինի զվոր) ասած գործարանում: ...Կտրած փողը (ոսկին ու արծաթը) ոչ այլ ինչ է, եթե ոչ տերութենի կողմից երաշխավորություն, որ էս ու էս մանեթը էսքան քաշ, պրոբ և արժողություն ունե: Մեկ խոսքով տերությունը էդ երաշխավորությունը փողին հրապարակական փոխ ու տուրսի նշանակություն է տալիս»¹⁸:

Այս Երիցյանն անդրադարձել է նաև թղթադրամի հարցի քննությանը: Նա ընդունում է, որ պատմականորեն սկզբնապես շրջանառության միջոցի ֆունկցիան կատարել են ոսկին ու արծաթը, նախ ձուլուկների և ապա դրամի ձևով: Շրջանառության պրոցեսում դրամի ռեալ սլարունակությունը աստիճանաբար խղվում է իր անվանական բովանդակությունից, սակայն մաշված դրամները շարունակում էին շրջանառություն կատարել որպես լիարժեք դրամներ: Այդ իրողությունը հանգեցրեց այն բանին, որ շրջանառության ֆունկցիայի իրականացման համար ոսկու և արծաթի փոխարեն սկսեցին բաց թողնել փոխա-րինող թղթադրամներ: Վերջիններս ըստ էության արժեք չունեին: «Առաջվա

¹⁴ Նույն տեղում, էջ 26:

¹⁵ Նույն տեղում, № 4, էջ 14:

¹⁶ Կ. Ս ա ր ք ս. Քաղաքատնտեսության քննադատության շուրջը, էջ 196:

¹⁷ «Վաճառական». 1866, № 11, էջ 42:

¹⁸ Նույն տեղում:

ժամանակները, — նկատում է Երիցյանը, — հասարակական տնտեսության մեջ փողը (ոսկին, արծաթը) նշանակություն ունեն, հիմի փողը առ փողը մենք կարողացել ենք առանց էդ մետաղների էլ առուտուր անել, զանազան թղթերի միջնորդությունով: Կդա ժամանակ, որ ոսկին և արծաթը բոլորովին էլ չի գործածվել փողի պես: Փող ասելով իհարկե հասկանում ենք միայն ոսկին և արծաթը, իսկ թղթե փողը (կրեդիտնի բիլետներ կամ ասիգնացիա) և բանկերի դուրս տված զանազան տոմսակները (սերիք և այլն) փողի նշաններ են և գործ են ածվում միայն փողի տեղ»¹⁹: «Փողի նշանների» վերաբերյալ նրա զրույթը ըստ էության բովանդակազրկվում է, քանի որ նա չէր հստականում ոսկու և արծաթի բնույթն իբրև փողի: Նա փողի մյուս ֆունկցիաների մասին ընդհանրապես չի խոսում և ապրանքային փողի փոխարինումը դրամանիշով չի ածանցում փողի՝ իբրև շրջանառության միջոցի ֆունկցիայի առանձնահատկության հետ: Ուստի և փողի ծագման պետական տնտեսության համաձայն, նա ոսկու և արծաթի՝ իբրև փողի, և թղթադրամի ծագումը ենթարկում էր նույն օրինաչափությաններին: Հենց այս առումով էլ նա չի համաձայնում բոլոր այն տրնտեսագետներին հետ, որոնք ոսկու և արծաթի այդ առանձնահատուկ դերը փորձում էին բացատրել այն բանով, որ դրանք «թանկ են, հազվագյուտ են, պինդ են, չեն փշանում և էսպիսի հատկություններով ավելի բարձր են, քան թե մյուս մետաղները և դրամաթղթերը»²⁰:

Ինչպես հայտնի է, Լյուդովիկոս XIV-ի մահից հետո Ֆրանսիան տնտեսական և ֆինանսական ծանր կացության մեջ է ընկնում: Երկիրը այդ դրությունից հանելու համար Շոտլանդիայից հրավիրում են Լոյին, որն իր հիմնած բանկային սիստեմով թղթադրամ թողարկեց Ֆրանսիայում, բայց ի վիճակի չեղավ երկիրը դուրս բերել տնտեսական ճգնաժամից: Ի դեպ, Լոյը միևրանտիքստների հայտնի գաղափարախոսներից էր, որը մետաղե դրամաշրջանառությունը տնտեսության զարգացման համար արգելակիչ ուժ համարելով, ամենաուսուցիչ փողը հռչակում էր թղթադրամը և դրանով իսկ վերջնականապես «մերկանտիլիզմը հասցնում աբսուրդի»²¹:

Երիցյանը նույնպես հակված էր գերազնահատելու թղթադրամի նշանակությունը և պատահական չէ, որ վկայակոչում է Ռիկարդոյի այն խոսքերը, որ «փողի կատարյալ ձևը թղթադրամն է»²²: Ի դեպ, սա յուրահատուկ էր նոմինալիստներին, հաստատելով «փողի նկատմամբ ապրանքային մոտեցման» անտեսումը և ընդունելով սուբստանցիոնալի հանդեպ նրա անվանական նշանակության առաջնությունը²³:

Ա. Երիցյանը համաձայն է Ալեքսանդր Հումբոլտի տեսակետին, ըստ որի, թղթադրամի առաջացման անհրաժեշտությունը պայմանավորված էր այն հակասությամբ, որ գոյություն ունեն ոսկու և արծաթի քանակության և առևտրի ընդլայնման միջև, այսինքն արտադրված ապրանքների և դրանց իրացման համար անհրաժեշտ փողի սահմանափակ քանակի հետ: «Ուրեմն որքան շատ է որևիցե երկրի առուտուրը ծաղկում, — դրում է նա, — էնքան ավելի է փողի հարկավորությունը շատանում և էնքան ավելի է քշանում և անհետանում փողը»²⁴: Ուստի նա կարծում է, թե կդա ժամանակը, երբ «ոսկին և արծաթը բոլորովին էլ չի գործածվել փողի պես»²⁵: Ինչպես իրավացիորեն նկատում է Ս. Զուրաբյանը, Երիցյանը ոչ թե բուրժուական շատ տնտեսագետների պես ուտոպիական ծրագիր ունեւր ընդհանրապես վերացնել փողը և դրանով իսկ հասնել կապիտալիստական ներհակությունների վերացմանը, այլ պարզա-

¹⁹ Նույն տեղում, էջ 41:

²⁰ Նույն տեղում, էջ 42:

²¹ Д. Розенберг. История политической экономии. Ч. I, М., 1934, с. 66.

²² «Վաճառական». 1866, № 27, էջ 105:

²³ А. Б. Эйдельмант. Очерки из истории денежных теорий. М., 1929, с. V.

²⁴ «Վաճառական». 1866, № 18, էջ 70:

²⁵ Նույն տեղում, № 11, էջ 41:

պես հանգում է աղելիվ մետաղները շրջանառության այլ միջոցներով փոխա-
րինելու գաղափարին²⁶։

Փողի քանակի և ապրանքների քանակի անհամապատասխանության հե-
տևանքն ըստ Երիցյանի լինում է այն, որ «կանգնում է առուտուրը, վաճառա-
կանների դուքաններում մնում են ածած ապրանքները, առնող չկա, փող չկա,
գործ չկա։ Առանց փողի ապրանքները մինչև անգամ իրենց արժողությունը
կորցնում են։ Ինչն է էդ բոլորի պատճառը — ոսկին ու արծաթը։ էդպես ահա
փողն է դադարեցնում առուտուրը, ոչնչացնում ապրանքների արժողությունը,
փողն է կոտորվածի և աղքատության պատճառը»²⁷։ Այդ առումով էլ նա մի
այլ տեղ փողը համարում է «առուտուրի չարիքը», որի պակասության ժամա-
նակ «գործը քշանում է, պարապ մարդիկ շատանում են, թանկություն է ընկ-
նում, ապրանքները քիչ են ծախվում, վաճառականները և ֆաբրիկաները
վնասում են, ու էդպիսով խզվում է մշակ մարդկանց օրական հացը։ Փողի
պակասության ժամանակ ֆաբրիկաները և գործարանի տները իրանք թանկ առ-
նելով չմշակած ապրանքները, քիչ էլ ցանկացողներ են գտնվում նրանց ապ-
րանքներ շինել տալու... արձակում են ավելորդ մշակներին և պակասեցնում
են մշակների օրական փորձը»²⁸։ Մի այլ առիթով նա նշում է, որ եվրոպական
ներկրների տնտեսական դարգացման պատմությունը վկայում է, որ «կիրգիս-
ների ամենից լավ գուշակողները բանկերն են», «բանկը ամեն անգամ շատ մեծ
դումարի վեքսիլներ է վեր առել գրավ, իր նաղդ փողը, իր ապահովությունը
բոլորը դուրս տվել»²⁹։ Այս առումով, խոսելով Ջոն Լոյի հիմնած բանկերի մա-
սին, եզրակացնում է, թե «այժմյան բանկերը չեն կարող կատարել իրենց նը-
շանակությունը և փոխանակ առուտուրին կենդանություն տալու, միայն դան-
դաղեցնում են առուտուրը և պատճառ են լինում կիրգիսների և թե կոտորու-
թյունների»³⁰։

Բանկերի նկատմամբ նման բացասական վերաբերմունքը պատահակա-
նություն չէր։ Դեռևս անցյալ դարի 30—40-ական թթ. տնտեսագետներ Օվերս-
տոնը, Տորրենսը և ուրիշներ տնտեսական ճգնաժամերի առկայությունն Անգ-
լիայում կապում էին բանկային գործի ոչ ճիշտ կազմակերպման հետ, որ իբր
արժեթղթերի չափից դուրս բացթողումը հանգեցնում է կանոնավոր դրամա-
շրջանառության խաթարումների՝ ճգնաժամերի պատճառ դառնալով։ Ճգնա-
ժամերի նման բացատրությունը չի կարող գիտական լինել և բնական է, որ
վերարտադրությունը կարգավորելու նպատակով Անգլիայում 1844 թ. անց-
կացված Ռոբերտ Պիլի բանկային ռեֆորմը որևէ գրական արդյունք չունեցավ։

Իհարկե, Երիցյանը բնավ էլ հակված չէր վերացնելու բանկերը։ Ընդհա-
կառակը, նա բանկերը դիտում էր որպես «հասարակության օգտի համար կազ-
մված բաներ», ուստի և առաջարկում էր՝ նախ իրականացնել հասարակա-
կան հսկողություն բանկերի վրա, ստեղծելով «մեկ հասարակական կենտրո-
նակալ բանկ», ուր կենտրոնացված լինեն առևտրական բոլոր գործարքները և
ապա, հաշվի առնելով «հասարակության օգուտը», կարգավորել «տոմսակնե-
րի և թղթադրամների գործածության ուղիղ ընթացքը»³¹։ Ինչպես տեսնում ենք,
Երիցյանը նպատակ ուներ շրջանառության ոլորտի կարգավորման միջոցով
շտկելու կապիտալիստական վերարտադրության ներհակությունները, չնկա-
տելով, որ բանկերի միջոցով տարերայնորեն տեղի է ունենում կապիտալի
բաշխում արտադրության տարբեր ճյուղերի ու ոլորտների միջև, որը նպաս-
տում է արտադրողական ուժերի զարգացմանը, արտադրության հասարակա-

26 Ս. Զ ու Ր ա բ յ ա ն. Հայ տնտեսագիտական մտքի զարգացման ուղիղ գծեր. Երևան,
1959, էջ 244։

27 «Վաճառական». 1866, № 18, էջ 70։

28 Նույն տեղում, № 14, էջ 54։

29 Նույն տեղում, № 24, էջ 94։

30 Նույն տեղում, № 27, էջ 105։

31 Նույն տեղում, էջ 107։

կան բնույթի խորացմանն ու կապիտալիզմի հակասությունների հետագա սրմանը:

Քաղաքատնտեսության պատմությունն սկսվում է մերկանտիլիստներից (XVI—XVII դդ.): Դա առևտրական կապիտալի զարգացման և «նախասկզբնական կուտակման» ժամանակաշրջանն էր, նրբ ստեղծվում էին կապիտալիստական հասարակարգի գոյացման նախադրյալներ: Մերկանտիլիստները վաղ շրջանի արդյունաբերական կապիտալին նախորդող առևտրական կապիտալի գաղափարախոսներն էին, կապիտալիստական հասարակարգի տնտեսական կառուցվածքի առաջին վերլուծողները, որոնք առաջին անգամ փորձ արեցին քննության ենթարկել հարստության ստեղծման պրոբլեմը: Երիցյանի համոզմամբ մերկանտիլիզմի տնտեսական ուսմունքը տիրապետել է մինչև XVIII դարի վերջերը, մինչև անգլիացի տնտեսագետ Ադամ Սմիթի հանդես գալը, որն իր «Ազգերի հարստություն» կոչված աշխատությունով քանդեց էդ ուսմունքի հիմքերը³²: Տեղին է նկատել, որ մերկանտիլիզմը իբրև տնտեսագիտական ուսմունք արդեն սկսել էր հաղթահարվել Յուրանսիայում ի դեմս դասական տնտեսագիտության, որի ներկայացուցիչները (Բուազիլբեր, Քենե, Տյուգո և ուրիշներ), սկսած XVIII դարից, տնտեսական երևույթների ուսումնասիրության ելակետը շրջանառության ոլորտից փոխադրեցին արտադրության ոլորտը, փորձելով տալ հարստության ստեղծման հարցի գիտական բացատրությունը: Մեկնակետ ունենալով Սմիթի արժեքի աշխատանքային տեսությունը, Երիցյանն այդ մասին չի ակնարկում, այլ վկայակոչումներ է կատարում ազատ առևտրի պաշտպանների աշխատություններից, ցույց տալու համար մերկանտիլիստների սխալները: Նրա կարծիքով թե՛ մերկանտիլիստները և թե՛ ազատ առևտրի կողմնակիցները իրենց մոտեցման մեջ ճիշտ չէին, «որովհետև երկուսն էլ մեկ նպատակ ունեն առաջներին, միայն թե նպատակին հասնելու համար դանազան ճանապարհներ ունեն ընտրած»³³, «քաղցածությունից կմեռնեին մարդիկ, եթե որ փորձ փորձեին գործ դնել կյանքի մեջ թե՛ մերկանտիլիզմի ուսումը և թե՛ ազատ առևտրի ուսումը»³⁴:

Կարծես հակված լինելով ընդունելու ազատ առևտրի քաղաքականությունը, Երիցյանը գրում է. «Կարծիք չկա, որ առևտուրը պետք է ազատ լինի — էդ է պահանջում առողջ դատողությունը, ճշմարտությունը և իրավունքը: Աշխատանքի և առևտրի ազատությունը միմյանց հետ անբաժան գաղափարներ են: Բայց հետագեմ քաղաքական տնտեսները առաջարկում են առևտուրի ազատությունից համար ոչնչացնել մաքսատները և վերացնել մանավանդ ներս գալու ապրանքների մաքսերը: Ի՞նչ է ուրեմն դրանց պահանջած առևտուրի ազատությունը, եթե էդ ազատության նպատակն է միմյանց օտար երկրի ապրանքների առանց մաքսի ներս բերելը, օտար երկրի ֆաբրիկաների մաքսառելը մեկերի հետ — էդ ոչ թե ազատություն է, այլ առևտրական անկանոնություն, շահասիրական ինքնակամություն, կնշտակե միջոց տալ ուժեղին իր ուժը գործ դնել տեղի դեմ, մշակներին հավիտյան ճորտ պահել և փողին ու զրամազլխին հաղթող հանդիսանալ»³⁵: Այստեղից էլ նրա այն հետևությունը, որ «առևտրի ազատությունը պետք է հիմնված լինի երկու երկրների իրենց ապրանքների հավասար տուր և առի վրա: Եթե մեկ երկիրը քիչ է փոխում և ծախում իր ապրանքը մյուսի հետ էս ընդդեմ է իր ճամբանին և տնտեսական օրենքին: Էդ պատճառով ամենքը, որոնք փոխում են կամ ծախում են իրանց ապրանքը, պետք է ստանան փոխարենը էլի էնքան գին ունեցող ապրանք կամ փող. ըստացածը տվածի հետ հավասար պետք է լինի, ոչ ավելի և ոչ պակաս: Էդ բանի վրա հիմնված է բոլոր հասարակական տնտեսությունը: Ամեն առևտուր, որ էդ օրենքի վրա չէ հիմնված, վնասակար է»³⁶:

32 Նույն տեղում, № 8, էջ 27:

33 Նույն տեղում:

34 Նույն տեղում, էջ 30:

35 Նույն տեղում, № 9, էջ 34:

36 Նույն տեղում:

ինչպես տեսնում ենք, Երիցյանը չէր ընդունում դասական տնտեսագիտության ազատ առևտրի սկզբունքները և հակված էր չափավոր մաքսային քաղաքականության միջոցով հավասարակշռված առևտրի իրագործմանը: Ճիշտ է, ազատ առևտրի քաղաքականությունը կործանարար հետևանքներ կարող էր ունենալ տնտեսապես թույլ զարգացած երկրների համար, սակայն հայ տնտեսագետը չէր հասկանում, որ այն պահանջները, որ դեռ շատ առաջ առաջադրում էին տնտեսագետներ Կրյուսեն, Բարգոնը, Քենեն, Ռիվերան և ուրիշներ և որոնք իրենց տեսական մարմնացումն ստացան Սմիթի և Ռիկարդոյի աշխատություններում, պատահական չէին և պայմանավորված էին օբյեկտիվ դործոններով: Ստեղծվել էր դրանց իրականացման նյութական հիմքը, կապված արդյունաբերական հեղաշրջման հետ, որն արդեն XVIII դարի վերջերից յնչյումներ էր առաջացնում Անգլիայի տնտեսական կյանքում: XIX դարի սկզբներին արդյունաբերությունն այնքան էր հզորացել, որ համաշխարհային շուկայում Անգլիայի համար ամեն մի մրցակցությունից դուրս վիճակ ստեղծելու հնարավորություն էր տվել: Այս առումով, որքան բնական էին մերկանտիլիզմի տեսական դրույթները, նույնքան նոր ժամանակների համար բնական էին ազատ առևտրի քաղաքականության վերաբերյալ դասական տնտեսագիտության տեսական հիմնավորումները: Ազատ առևտուրը տնտեսական ազատ նախաձեռնության սկզբունքներից մեկն էր, որն ակնկալում էր արդյունաբերական բուրժուազիայի քաղաքական տիրապետության հաստատում և միջնադարյան ցեխային հարաբերությունների վերջնական ոչնչացում: Ազատ առևտրի Երիցյանի ըմբռնումները վկայում են, որ երկրամասի սոցիալ-տնտեսական զարգացման հարցերում նա հարում էր ազգային-պահպանողական հոսանքի գաղափարական հայացքությանը:

Երիցյանի մի շարք ասույթները վկայում են, որ հարստության ստեղծման պրոբլեմը նա ավելի շուտ լուծում է մերկանտիլիզմի ուսմունքի շրջանակներում: «Առևտրի մեջ միշտ նրա կողմն է օգուտը ով ավելի փող ունե ու կարողացել է սրան կամ նրան շահով իրանց տալ», «Ով է հարուստը—փողատները, որը որ նաողո ոսկի և արծաթ ունե, թե վաճառականը, որը որ ապրանք ունե դարսած իր ամբարներում: Փողատները միշտ կարող է առնել ինչ-որ կամենա, իսկ վաճառականը առաջ պետք է ծախս իր ապրանքները, որ հետո փող ունենա, իսկ ապրանքները ինչպես հայտնի է ամեն բոլոր ու ոնց որ լինի չի կարելի ծախել: Ամեն փոքրիշատե առուտուրի հետ ծանոթ մարդ գիտե, որ առանց փողի առուտուրը— կոտրութենի նշան է, էդ է պատճառը, որ ոսկու և արծաթի մեք երկրի սահմանից դուրս տանելուցը կանգնում է ու դժվարանում է առուտուրը»³⁷, «բոլոր մարդկությունի վիճակը կախված է առուտուրից: Եթե հանկարծ վերջանար աշխարհիս վրա էդ առ ու տուրը, կարելի է ասել, որ ընդհանուր մարդկությունը կկոտորանար, հարյուր միլիոնավոր մարդիկ քաղցած կմեռնեին... Առուտուրը նման է մեք երակներում վազող արյունին, և ինչպես որ արյունի վազելու շտապեցնող կամ ծանրացնող բաները վնասակար են առողջութենին, էնպես էլ մեք տնտեսական կյանքին և բարօրութենին վնաս է էն ամեն բանը, որը որ խանգարում է և ծանրացնում է առուտուրի ուղիղ ընթացքը»³⁸: XIX դարի 60-ական թթ. հայ իրականության բուրժուական զարգացման պրոգրեսիվ տենդենցները դեռ նոր էին ձևավորվում, ուստի միանգամայն բացատրելի են տնտեսական երևույթների նման մեկնաբանությունները: Ֆ. Էնգելսը մի առիթով նկատել է, թե «կապիտալիստական արտադրության չհասունացած վիճակին, չհասունացած դասակարգային հարաբերություններին համապատասխանում էին նաև չհասունացած տեսությունները»³⁹:

Ա. Երիցյանը աշխատանքի բաժանումը չէր կապում արտադրողական ուժերի և ապրանքափոխանակային հարաբերությունների զարգացման հետ: Քա-

37 Նույն տեղում, էջ 33—34:

38 Նույն տեղում, № 19, էջ 74:

39 Կ. Մարքս և Ֆ. Էնգելս. Ընտիր երկեր. հ. 3, էջ 151:

նի որ առանձին անհատը իր բազմակողմանի պահանջմունքների բավարարման համար չի կարող ամեն ինչ արտադրել, ուստի և առաջանում է «մեկը մյուսին օգնելու» անհրաժեշտությունը: «Մեկը մյուսին օգնում է, — գրում է նա, — մեկը չի կարող ապրել առանց մյուսի, որովհետև մեկ մարդ հնար չունի իրան կյանքի մեջը հարկավոր ամեն բաները պատրաստելու: Մի՞թե կարելի է, որ մեկ մարդ միևնույն ժամանակը երկրագործ էլ լինի, ջրաղացպան էլ, հաց թխող էլ, ոչխարապան էլ, մահուդ շինող էլ, դարբին էլ, ոսկերիչ էլ և այլն և այլն: Անկարելի բան է»⁴⁰: Եթե սա մի կողմից հիշեցնում է տնտեսական կյանքում մարդկանց փոխհարաբերությունների մասին Ադամ Սմիթի ձևավերպումը, թե «տուր ինձ այն, ինչ ինձ անհրաժեշտ է և դու կստանաս այն, ինչ քեզ է անհրաժեշտ»⁴¹, ապա մյուս կողմից ընդհանրություններ է հայտնաբերում Ֆրեդերիկ Բաստիայի՝ շահերի ներդաշնակության տեսության հետ⁴²: Երիցյանը, կարծես կրկնելով տնտեսական հարաբերությունները փոխադարձ ծառայություններ դիտելու վերջինիս մտայնությունը, գրում է. «Ամեն տեսակ առևտրի մեջ, ծախողը և առնողը միմյանց ծախածի և առածի, կամ պարզ ասենք, միմյանց վրա փոփոխած ապրանքների հավասար հարկավորություն ունեն և էդ պատճառով հավասար էլ ծառայություն են ցույց տալիս միմյանց: Էս է առևտրի օրենքը և նշանակությունը, բայց միմիայն ոսկու առևտուրը էդ օրենքին չի ենթարկվում»⁴³: Այսպիսով, եթե մի դեպքում կապիտալիստական հասարակարգն իր սոցիալական ու տնտեսական հակասություններով ներկայանում է որպես ներդաշնակ ասոցիացիա, ապա մյուս կողմից, նրա տնտեսագիտական սխտեմը փաստորեն ուղղված էր դասական տնտեսագետների արժեքի աշխատանքային տեսության դեմ:

Ա. Երիցյանը անդրադարձել է նաև երկրամասի ներտնտեսական խնդիրների լուսաբանությանը: Հայտնի է, որ տնտեսագիտության ազատ դպրոցի ներկայացուցիչները մրցակցությունը համարում էին տնտեսական կյանքի ղարգացման խթանը: Երիցյանը, բիրժաների մասին խոսելով, նկատում է, թե «բոլոր էդ վաճառականների թե՛ ծախողների և թե՛ առնողների միասին ժողովվելը և միասին գործ տեսնելը պատճառ է լինում նրանց մեջ կոնկուրենցիա ծագելու, առանց որի ոչինչ առաջադիմություն աշխարհիս վրա կարելի չէ: Կոնկուրենցիան միայն կարող է չափավոր ուղղություն տալ վաճառականներին վնասակար մոնոպոլիայից»⁴⁴: Ինչպես տեսնում ենք, ազատ մրցակցությունը ղարգացման խթան դիտելուց բացի (որը համապատասխանում էր ղարգացման բուրժուական ուղին թևակոխած երկրամասի պահանջներին), նա այն դիտում էր որպես մոնոպոլիայի առաջացմանը խոչընդոտելու կարևորագույն միջոց, չնկատելով, որ ազատ մրցակցությունը հենց այն գործոններից մեկն է, որը ղարգացման դիալեկտիկայի ուժով տանում է դեպի արտադրության համակենտրոնացում և դրա հետ նաև՝ մոնոպոլիաների առաջացում:

⁴⁰ «Վաճառական». 1866, № 35, էջ 138.

⁴¹ А. Смит. Исследование о природе и причинах богатства народов. М.—Л., 1931, с. 21.

⁴² Сб. Ф. Бастиа. Экономические гармонии.—«Библиотека экономистов». Вып VII. М., 1896, с. 210.

⁴³ «Վաճառական». 1866, № 19, էջ 74:

⁴⁴ Նույն տեղում, № 30, էջ 119:

Ա. Երիցյանն ընդհանրապես կողմնակից էր երկրամասի տնտեսական արագ զարգացման համար արտադրություն առաջավոր մեթոդների ներդրմանը: «Արդյոք մեր արհեստավորները, գետին վարողները և տավար պահողները աշխատում են իրանց արհեստների կատարելագործելու համար,— գրում է նա,— թե՞ էլի վաղուցվա պես շարունակում են իրենց գործը: Յավով ենք ասում, որ մեր երկրի արհեստները և վաճառականությունը համարյա թե միևնույն օրումն են, ինչպես առաջ»⁴⁵: Այս առումով նա կարևոր է դիտում եվրոպական կապիտալի բարերար ազդեցությունը, որը ցույց կտա, «թե ինչպես պետք է ավելի օգուտ քաղել մեր երկրիցը, որն ամեն բանով հարուստ է և շատ բիշ մարդիկ ունե, որ սարերիցը հանեն ու հալեն հանքերը, կանոնավոր կերպով տավար պահեն, ապրեշում շինեն, բամբակ ցանեն և այլն», երկաթուղու շինարարությունը, որը մեծապես կընդլայնի երկրամասի կապերը այլ տնտեսական շրջանների հետ, ուսումնարանների բացումը, որոնք հնարավորություն կտան «կանոնավոր կերպով սովորեցնելու մեղ հարկավոր արհեստները»⁴⁶ և այլն և այլն: Տնտեսական զարգացման համար ոչ պակաս նշանակություն ունեն առնչությունները, ինչպես, օրինակ, 1867 թ. Փարիզի համաշխարհային ցուցահանդեսը, որը մեծապես նպաստեց արտադրության առաջավոր մեթոդների ճանաչմանը: Երիցյանը հատկապես կարևոր էր համարում բնական գիտությունների զարգացումը: Ի գեպ, նկատենք, որ այդ գործոնին կարևոր նշանակություն էր տալիս Պիսարևը, որը շեշտելով գիտության դերը արտադրողական ուժերի զարգացման պրոցեսում, բնական գիտությունները համարում էր արտադրողական ուժերի բաղկացուցիչ մասը: Ընթերցողներին ծանոթացնելով Պ. Ռոնչևսկու կարդացած մի դասախոսությանը, Երիցյանը շեշտում է նրա այն տեղերը, որոնցում հեղինակը, նկատի առնելով եվրոպական երկրների տնտեսական զարգացման փորձը, ընդգծում է, որ «Արևմտյան եվրոպայում սովորելու և գրավող բանն է բնական գիտությունը... ոչ մեկ գիտություն էնքան օգտավետ չէ և մարգու պիտանի, ինչպես բնական գիտությունները»⁴⁷: Այս առումով «Վաճառական» թերթը դրվատանքով է խոսում 1865 թ. Մոսկվայում «Петровская земледельческая и лесная Академия»-ի բացվելու մասին:

Հետևելով անգլիացի տնտեսագետ Կոբդենին, Երիցյանը հասարակական բարօրությունը մի զգալի մասով էլ կապում է խնայողության գաղափարի հետ: «Աշխատանքը և պահպանողությունը,— գրում է նա,— կարող են ամեն մարդու անկախություն հասցնել: Հասարակ արհեստավորն էլ ու մշակն էլ կարող են անկախություն ճանաչել, եթե ղեռնարկներով ետ գցեն իրանց արդյունքը և իրանց փողերի անօգուտ բաների վրա մսխելուց ձեռք վեր առնեն: Թեպետ շատ փոքր բան է յուրաքանչյուր կոպեկը, բայց էդպիսի կոպեկների օրինավոր մսխելով և պահպանությունով, շատ անգամ կարող են ապահովել հազարավոր գերդաստաններ»⁴⁸: Նման մեկնությունը տեսական եզրեր է որոնում գոհճիկ տնտեսագիտության «ժողովրդական» տեսության հետ, որը մի կողմից արդարացնում է հարստության բաշխման կապիտալիստական կարգը, մյուս

⁴⁵ Նույն տեղում, № 3, էջ 10:

⁴⁶ Նույն տեղում:

⁴⁷ Նույն տեղում, № 6, էջ 23:

⁴⁸ Նույն տեղում, № 35, էջ 138:

կողմից հանդես գալիս որպես հասարակական առաջընթացի ղսպանակ: Թեկուզ ոչ հստակ, նրիցյանն այնուամենայնիվ կարևոր էր համարում նաև փողերի արտադրողական կիրառությունը:

Սրանք են տեսական այն զուգահեռները, որոնց շրջանակներում նրիցյանը կատարում է տնտեսական կատեգորիաների վերլուծությունը: Ինչպես նրա, այնպես էլ ընդհանրապես «Վսեմառականի» տնտեսագիտական դիրքորոշումները իդեալիստական բնույթ ունենին: Թեև գուշ ու գիտակցության փիլիսոփայական հարցում առանձին դեպքերում կարևոր և առաջնային տեղ էր հատկացվում նյութական կողմին, սակայն դրանք մնում էին միայն որպես մասնակի դիտարկումներ: Քանի որ շրջանառության ոլորտին առաջնային նշանակություն է տրվում, պարզ են դառնում հասարակության պատմական զարգացման հարցերի վերաբերյալ առաջադրված սկզբունքների ներքին հակասություններն ու սահմանափակությունը, այդ սկզբունքների մետաֆիզիկ բովանդակությունը, որոնք, սակայն, հետաքրքրական են ժամանակի հայ տնտեսական մտքի առանձնահատկությունների բացահայտման տեսակետից:

СОЦИАЛЬНО-ЭКОНОМИЧЕСКИЕ ВЗГЛЯДЫ АЛЕКСАНДРА ЕРИЦЯНА

Р. Н. САРИНЯН

(Резюме)

Александр Ерицян—один из известных представителей армянской общественной мысли второй половины XIX века, исследователь экономических отношений Закавказья, анализировавший их по опыту русских и европейских экономических учений. Его взгляды представляют определенный интерес для истории армянской экономической мысли. Так как в экономической жизни Закавказья преобладал торговый капитал, в исследованиях Ерицяна первостепенную значимость получили темы денег и сферы обращения. В статье подвергаются критическому анализу высказывания Ерицяна по вопросам исторического развития общества, показываются внутренние противоречия, ограниченность выдвинутых им принципов и их метафизическое содержание.